

夢花亭駢體文集

蘭華亭

駢體文

鐘木四齋

吳興劉氏
嘉業堂刊

夢花亭駢體文集目錄

卷一

送吳鑄生先生主講乍浦滿洲書院序

吳右厓鶯湖泛櫂圖序

謝范小庭餽高麗葎啟

飭盤韻事詩序

吳右岑憶花詩序

黃柳橋先生秋夜填詞圖題詞

書魏于雲事

謝吳子音先生惠漆沙硯啟

約同人聽陳雲圃女郎彈琵琶啟

春塋視殯圖記

卷二

范白舫先生茗溪漁隱詞序

范白舫先生茗溪漁隱詩序

范白舫先生漢口叢談序

秦公嘯廬傳

李君鐵笛傳

于問樵聽香樓詞序

葉子良桃花瘞蜨圖題詞

董蓮厓先生柳州買醉圖序

孫九靈秋窗烟雨圖序

俞譜華數帆亭圖序

卷三

劉茗漁先生憶書圖序

董壺山先生紫藤花館詞序

嚴節母陳太孺人徵詩啟

顧榕屏先生橫山草堂圖序

柳河東小集序

飲香樓詩序

臨野堂圖序

蕉窗讀畫圖序

與紫陽監院陳琴齋孝廉書

與殷譜經編修書

卷四

宋岳續忠侯像贊

宋岳鄴侯像贊

孝子岳冰庵先生贊

顧湘舟五十壽序

葉漁莊五湖漁莊圖序

知州銜候選布政司經歷扶九葉君誄

董雲帆先生像贊

葉清甫補華精舍圖序

葉漁莊太湖竹枝詞序

侯選州同知漁莊葉君誄

夢花亭駢四文集目錄

卷一

夢花亭駢體文集卷第一

吳興叢書

烏程陸長春瓣香著

送吳鑄生先生主講乍浦滿洲書院序

今使短衣射獵夜臥南山匹馬從軍晨征北漠盾頭磨
墨草露布千言塞上吟詩奏饒歌一曲折玉關之楊柳
時聞勅勒之聲譜羌笛之梅花頓換伊涼之調將相何
曾有種男兒亦足以豪然而弓矢常燦烽烟久靖才人
捫蝨何處談兵壯士聞雞輒思起舞毛錐擲去空懷殺
賊之心金印懸來未應封侯之驗於是輕裙偶曳短刺
自通鼓角開轅戈鋌肅隊鞭敲銅鐙入幕府而高歌帳
列銀刀向軍門而長揖朗誦六韜之記部將傾聽能開

五石之弓健兒咋舌如吾鑄生先生者何其壯也先生
文陣雄師詞壇老將筆花怒放血戰千人詩律精嚴長
城五字相如之賦飄飄欲凌雲龍門之文落落有奇氣
屬以琴將煮鶴書不換鶯釜有黿生券無驢賣問字之
酒屢覺其空束修之羊甚嫌乎瘦三更機杼難分隣女
之光百里餽糧莫貸監河之潤方朔臣饑欲死馮煖何
以爲家則有晴嵐哈都統者憫范叔之單寒喜鄒陽之
傑傲將軍愛士燒紅蠟以留賓驃騎憐才擊黃塵而饗
客自剝元狐之腋爲量體裁裘請呈白鹿之祥替揮毫
作奏酌叵羅而勸醉十斛葡萄聽刁斗之巡營一聲簞
築得以後驂同載長鋏無歌牙兵供乎指揮校尉仰其

聲息酒邊說劍鬚作戟張席上橫刀膽如桶大先生之
願足矣都統之心猶未艾也乍浦有滿洲書院延先生
掌之以五經通儒作八旗都講牛心啖後塵尾揮餘名
高師傅之中座出元戎之右門前立雪多長槍殺虎之
材帳下談經有硬弩吟猿之技以忠信爲甲冑以道德
作干戈借詩書消强悍之風懼金鼓裂英雄之氣相與
安絃撫縵雅歌投壺夫子博我以文諸生以時習禮上
佐

聖主臨雍之化中慰司徒造士之懷下答都督傾襟之
誼將見戎行勁旅盡識文章技擊材官無慚儒雅分竿
角射春秋有講武之歡從壯獻研草野備干城之選然

則此行也又豈徒縱轡壁門之內驍騎改容抵掌華屋
之間上公前席而已哉先生行矣僕夫歌驅候人如鷺
聘辭敦厚識儒將之風流傲骨嶙峋寬書生之禮數殘
牙尙健來食五侯之鯖豪氣能飛去奪三軍之槩他日
槐花黃後細柳營歸示我以金鉦鼓吹之詞鐵撥琵琶
之唱當細細挑燈讀之也

吳右厓鶯湖泛櫂圖序

涼波盪翠新蒲弄香魚唼葉而聽吟鷗選花而眠夢討
秋之句載諸孤篷懷美之思飄自短笛雙槳揮綠一竿
釣青菱乍采而歌聞綸罷垂而謳起此吳君右厓鶯湖
泛櫂圖也夫烟波之詠通之紅鱗恬淡之情盟於白水

昔人理榜待月扣舷唱春草屨撈鰕竹闌鬪鴨輕雲粘
乎簫笠落花點上秧蓑橫塘夢蛤之鄉疏柳垂虹之路
玉簫金管坐乎兩頭蜺妹魚姑窺之半面類皆寄情舟
楫招隱烟蘿家妻孥於一船浮書畫於單舸雲山四碧
憺然忘歸矣然而纓濯空歌梁炊未熟纖僚可樂雖有
美乎濠梁倦鳥尙飛輒自罹乎矰繳語夫蕢洲笛譜粵
港漁筒雕盤菰米之香碧澗芹羹之味未有不思拋塵
鞅願製荷衣秋水吟溯洄之詩美人動遲暮之感煎茶
一具付之樵青沽酒滿瓶酌以太白盡棄田廬之事長
爲菰蘆中人也今右厓脚不插於軟紅心自澄於空碧
慕漁家之樂只傍鴛鴦賦彼澤之陂剛開菡萏小舫如

織遠山若無鷺一足而莎拳花四壁而艇礙點篙徑去
搖櫓還來則當夫紫蟹初肥銀魚爛賤放桃花之春溜
趁石鰕之秋風平波臺前尋煙而語畫眉橋畔解纜以
嬉移橈紅藕香中舉網綠楊陰裏錦鯉三尺躍諸船頭
銀蟾半鉤墮於篷背小令被之絃管閒情寫以畫圖幾
幾乎疑陶峴以水仙傲志和之漁父矣僕家住苕溪門
多楓樹數椽板屋築亦臨流一箇瓜皮牽之就舡徒以
歸心水阻鄉夢雲迷遂使青雀翹余白鷗笑我乖細雨
斜風之調負鱸魚莼菜之期釣伴常招浪遊殊悔江南
秋好新詞宜唱竹枝渡口人逢畫楫須迎桃葉

謝范小庭餽高麗蓼啟

僕貧惟飲水潔似秋蟬病不禁寒瘦逾仙鶴鄙露葵之
心熱最愛瓜涼貪崖蜜之齒甘輒嫌茶苦行同木槁肘
見柳生河魚之疾未瘳花豬之肉無味亦嘗評量本草
檢校方書八月斷壺三年蓄艾而園中杞菊不賦龜蒙
井上麴蘗空號叔展醫未逢乎扁鵲骨欲出乎飛龍今
蒙上藥輕投靈芝分餉長鑣刷去猶連瑤島之雲妙劑
量來尙帶金盤之露結仙根於海外珠草含胎鍾秀氣
於天南琪花吐豔細嚼則泉生舌本微噙而香滿齕間
勝燒不老之丹抵喫長生之果嗟嗟黃精當飯大可療
饑甘草代茶應能解渴歡防風之粥妄想延年噉茯苓
之湯便思益壽桃子難偷乎方朔刀圭要乞於姮娥絳

雪能嘗元霜願搗酖人休慮拜軍中羊叔之貽畫我何
須免洞口劉郎之采

余有天台
采藥圖

飢盤韻事詩序

名原可噉何來畫餅之譏膽亦能豪請試題饌之手若
乃街隣米市廡賃僧房借香積之厨設花資之店元霜
夜搗嫦娥杵落三更白雪晨炊菩薩甘分一饌金刀碎
劃疑翻鶯鬪之波粉甌勻蒸巧竊蟾圓之樣微和婆蘭
濃配糖霜每當賈客停撓遠人問姓青錢數去笑看姹
女蛾眉絳紙攢來彩奪蠻王獅子靡不堆盤小喫懷袖
分遺饑可饜乎老饕換欲脫之半臂吟邊細嚼詩添名
士之題茶罷輕拈香沁美人之齒遂爾聲騰蕭寺價重